

आकाशवाणी

खास-खास खबरां:-

1. प्रधानमंत्री नरेन्द्र मोदी होर अज्ज किर्गिस्तान दी राजधानी बिश्केक च आयोजित 26में शंघाई सहयोग संगठन शिखर सम्मेलन गी सम्बोधित करडन।
2. भारत दे सकल घरेलू उत्पाद यानि जीडीपी 7 इशारिया 8 प्रतिशत।
3. भारत दे सकल घरेलू उत्पाद-GDP च 7 इशारिया 8 फीसद दा बाद्दा दर्ज होने मगरा अमरीका नै भारत गी इक गतिशील मज़बूत ते लचीली अर्थबवस्था दस्सेआ।
4. नेपाल च बचाव दल त्रिशुली 3-A पन बिजली परियोजना थाहर पर गारे कन्नै भरी दी सुंगे च फसे दे थमां मते मज़दूरें तगर पुजने आस्तै तेजी कन्नै जत्त जारी ऐ। 600
5. भारत नै विश्व बैंक आस्सेआ सिंधु जल समझौते पर कायम मध्यस्थरता अदालत दे फैसले गी पूरी चाली कन्नै खारिज करी दिता ऐ।
6. मन्नेपरमन्ने दे फुटबॉल खडारी लियोनेल मेसी होरें अंत-राष्ट्रीय फुटबॉल थमां सन्यास दी घोषणा करी दिती ऐ।

<><><><><><>

PM-SCO Summit

प्रधानमंत्री नरेन्द्र मोदी होर अज्ज किर्गिस्तान दी राजधानी बिश्केक च आयोजित 26में शंघाई सहयोग संगठन शिखर सम्मेलन गी सम्बोधित करडन। एह शिखर सम्मेलन शंघाई सहयोग संगठन दी 25मीं बरेगंड दे सरबंध्यै च आयोजित कीता जा'रदा ऐ। SCO बैठक च भारत- चीन ते रुस सनें 10 होर सदस्य मुख्य शामिल न। प्रधानमंत्री नरेन्द्र मोदी होरें कल किर्गिस्तान दी अपनी 2 दिन दी यात्रा दे पैहले दिन बिश्केक च शंघाई सहयोग संगठन शिखर सम्मेलन दौरान रुस- ईरान- किर्गिस्तान गणराज्य ते आर्मेनिया दे नेताएं कन्नै दपक्खी बैठक कीती। इनें बैठकें च बक्ख-बक्ख पैहलुएं ते आपसी हित दे मुद्दे पर चर्चा होई। प्रधानमंत्री होरें कल संजा बिश्केक च 6में World

Nomad Games आधिकारिक उदघाटनी समारोह च होरनें दुए SCO सदस्य मुखें दे नेताएं कन्नै हिस्सा लैता।



Modi –Putin Meet

प्रधानमंत्री नरेन्द्र मोदी होरें किर्गिस्तान दे बिश्केक च 26में सालाना शंघाई सहयोग संगठन शिखर सम्मेलन दे बाहरें रुस दे राष्ट्रपति व्लादिमीर पुतिन हुंदे कन्नै गल्लबात कीती। चर्चा च मुख करी ध्यान भारत ते रुस दे किट्टे रलियै कम्म करने आले क्षेत्र पर दिता गेआ जिंदे च बपार- निवेश- ऊर्जा ते रक्षा वगैरा शामिल न। प्रधानमंत्री मोदी होरें गलाया जे उनें'गी इस गल्लै दी बड़ी खुशी ऐ जे दौनें मुखें बश्कार साथ-सहयोग लगातार मजबूत होआ रदा ऐ। यूक्रेन संघर्ष बारे उ'नें जोर देइयै आखेआ जे इक शांतिपूर्ण हल दी लोड़ ऐ। उ'नें राष्ट्रपति पुतिन होरें'गी आखेआ जे समस्याएं दा शांतिपूर्ण तरीके कन्नै हल कहुना इस्लै मनुक्खता दी लोड़ ऐ। प्रधानमंत्री होरें गलाया जे भारत- शांति दी दिशा च कीते जाने आले सब्भनें जतनें दा समर्थन करदा ऐ। एह बैठक सालाना ब्रिक्स शिखर सम्मेलन लेई पुतिन हुंदे भारत दे दौरे कोला ठीक इक हफ्ता पैहले होई ऐ।



GDP-PM

प्रधानमंत्री नरेन्द्र मोदी होरें चालू माली बरे दी पैहली तिमाही च भारत दे सकल घरेलू उत्पाद यानि जी.डी.पी दे 7 इशारिया 8 प्रतिशत रौहने गी इक बड़ी उपलब्धि करार दिता ऐ। अपनी इक सोशल मीडिया पोस्ट च प्रधानमंत्री होरें आखेआ कि तेल दिएं कीमतें च बादे-घट्टे, सप्लाई श्रृंखला च रूकावट ते कुल संसारी सतह पर बनी दी जक्कोतक्की आहली स्थिति दे बावजूद बी भारत दी जीडीपी दा इन्ना मजबूत बने दा रौहना भारत दे लोकें दी सांझी ताकत ते पक्के निश्चे गी दर्शादा ऐ। इसै दरान केंद्री खजाना मंत्री निर्मला सीतारमण होरें बी आखेआ कि इस मजबूत प्रदर्शन दा सेहरा देश

दी जनता ते उंदी सख्त मेहनत दे सिरै पर शोभदा ऐ। खजाना मंत्री होरें आखेआ जे एन.डी.ए सरकार आसेआ कीते गेदे सुधार ते अर्थ बवस्था दे कुशल प्रबंधन दे खरे नतीजे सामने अवा करदे न।



India-US Economy

अधिकारिक आंकड़े मूजब भारत दे सकल घरेलू उत्पाद –GDP च 7 इशारिया 8 फीसद दा बाढ़ा दर्ज होने मगरा अमरीका नै भारत गी इक गतिशील- मज़बूत ते लचीली अर्थ-बवस्था दस्सेआ। इक समाचार एजेंसी गी दिते गेदे इंटरव्यू च व्हाइट हाउस दे वरिष्ठ उप प्रेस सचिव कुश देसाई होरें आखेआ जे विकास दे एह आंकड़े ट्रम्प प्रशासन दे भारत गी इक तेजी कन्नै बददी आर्थिक शक्ति दे तौर पर दिक्खने दे नजरिए दी तस्दीक करदे न। उ'नें आखेआ जे भारत दी विशाल ते विस्तारित अर्थ-बवस्था अमरीकी कम्पनिएं ते निवेशकें आस्तै मौके प्रदान करदी ऐ। अमरीकी प्रशासन भारत च अमरीका दे निवेश गी प्रोत्साहित करना चाहंदा ऐ ते अमरीका च भारतीय निवेश गी बी बढ़ावा देना चाहंदा ऐ। देसाई होरें आखेआ जे राष्ट्रपति डोनाल्ड ट्रम्प भारत कन्नै सरबंधें गी बड़ा महत्वपूर्ण मनदे न ते पर्यावरण ते जलवायु बदलाव पर दपक्खी सहयोग गी मज़बूत करने आस्तै चौथा भारत-जर्मनी पर्यावरण मंच अज्ज नमीं दिल्ली च आयोजित किता जाग। केन्द्रीय पर्यावरण- जंगलात ते जलवायु बदलाव सरबन्धी मंत्री भूपेन्द्र यादव ते जर्मनी दे पर्यावरण कुदरत दे संरक्षण- जलवायु संरक्षण ते परमाणु सुरक्षा मंत्री इस मंच दी सह-अध्यक्षता करडन। दवै पक्ख दपक्खी सहयोग गी होर मज़बूत करने- अनुभव सांझा करने ते व्यवहारिक सहयोग गी अगगे बदाने आस्तै पर्यावरण संरक्षण ते जलवायु नीति कन्नै सरबन्धित प्रमुख मुद्दें पर चर्चा करडन। एह मंच नीति निर्माताएं- निजी क्षेत्र दे प्रतिनिधिएं- विचारकें ते होरनें प्रमुख सरबन्धी धड़े बश्कार पर्यावरण ते जलवायु सहयोग पर दपक्खी आदान-प्रदान आस्तै इक मंच प्रदान करोग।



Nepal Rescue Op.

नेपाल च बचाव दल त्रिशुली 3-A पन बिजली परियोजना थाहर पर कीचड़ कन्नै भरी दी सुरंगे च फसे दे 600 थमां मते मज़दूरें तगर पुजने आस्तै तेजी कन्नै जत्त जारी ऐ। बचाव दल सुरंगें गी साफ करने ते जिंदा बचे दे लोकें दी तपाश आस्तै विस्फोटकें- भारी मशीनें ते एयर पम्पें दा इस्तेमाल करा'रदा ऐ। नेपाल दे आपदा प्रबंधन प्राधिकरण मूजब 939 लोकें दी मौत होई चुकी दी ऐ ते 3 ज्हार 925 लोक लापता ना। इ'नें लापता लोकें च 592 विदेशी नागरिक शामिल ना। हुने तगर पन-बिजली परियोजनाएं थमां 279 लोके गी बचाया जाई चुके दा ऐ- जिसले कि मुख्य भरै च 11 ज्हार थमां मते लोकें गी बचाया जाई चुके दा ऐ। बचाव अभियान च भारत- दक्खण कोरिया ते आस्ट्रेलिया दे माहिरें कन्नै नेपाली ते चीनी सैन्य दल सहयोग करा'रदा ऐ।



India –Indus Water Treaty

भारत नै विश्व बैंक आस्सेआ सिंधु जल समझौते पर कायम मध्यस्थरता अदालत दे फैसले गी पूरी चाली कन्नै खारिज करी दिता ऐ। भारत नै न्यायाधिकरण दे अधिकार गी नकारदे होई ओदे फैसले गी कनूनी तौर पर अमान्य दस्सेआ ऐ। विदेश मंत्रालय नै सोशल मीडिया पोस्ट च आखेआ जे भारत नै मध्यस्थरता पैनल गी कदें बी मान्यता नेंई दिती- नां गै ओदी कारवाई च हिस्सा लैता ते नां गै ओदे फैसले कन्नै बाध्य होगा। भारत नै एह बी दोहराया जे सिंधू जल समझौता अजें बी स्थगित ऐ। एह ब्यान हेग स्थित मध्यस्थता अदालत दे उस फैसले दे बाद आया ऐ जेदे च आखेआ गेआ हा जे समझौते गी स्थगित करने दे भारत दे फैसले गी पैनल सेई नेंई ठहरांदा ऐ। पैनल नै भारत थमां 1960 आहले पानी दी बंड सरबन्धी समझौते दे तैहत अपनी जिम्मेदारिएं दा पालन करने लेई आखेआ।

भारत नै इस फैसले गी खारिज करदे होई तर्क दिता जे मध्यस्थता पैनल दी स्थापना गै संधि दी शर्तें दी खिलाफवर्जी करदे होई कीती गेई। विदेश मंत्रालय नै आखेआ जे समझौता जां ढांचा परियोजनाएं कन्नै सरबन्धी भारत दे फैसले पर पैनल दा कोई अधिकार नेंई ऐ। पिच्छले बरे अप्रैल च पैहलगाम आतंकी हमले मगरा राष्ट्रीय सुरक्षा चिंताएं ते लगातार जारी बन्ने पारा आतंकवाद दा हवाला दिंदे होई भारत नै सिंधु जल समझौता निलंबित करी दिता हा।



Pralhad –MNRE Review Meet

अक्षय ऊर्जा मंत्री प्रहलाद जोशी होरें कल मंत्रालय दे वरिष्ठ अधिकारिणं कन्नै व्यापक समीक्षा बैठक कीती। सोशल मीडिया दी पोस्ट च जोशी होरें दस्सेआ जे बैठक च मुल्खा च हरित विकास गी गति देने ते अक्षय ऊर्जा कन्नै जुडे दे जत्तें गी मज़बूत करने पर चर्चा होई। एदे च खास तौर पर पूर्वोत्तर राज्यें पर ध्यान दिता गेआ। बैठक च प्रधानमंत्री सूर्य घर- पी.एम कुसुम ते पी.एम जनमन जनेई केन्द्र सरकार दी प्रमुख योजनाएं दी अमलावरी दी समीक्षा कीती गेई। कन्नै गै योजनाएं गी लागू करने च आवा'रदी चुनौतियें गी दूर करने ते मुल्खै च अक्षय ऊर्जा दी संभावनाएं दा पूरा लाह ठोआने दे उपाएं पर चर्चा होई।



SC

सुप्रीम कोर्ट नै एसिड हमले पर केन्द्र सरकार थमां जवाब मंगेआ ऐ जे केह एसिड दी खुदरा बिक्री पर पूरी चाली रोक लाई जानी चाईदी- जां इसी सख्त नियमें दे दायरे च आनेआ जाना चाईदा। एह निर्देश 2013 च जारी दिशा-निर्देश दे बावजूद एसिड दी असानी कन्नै उपलब्धता गी लेइए बनी दी चिंताएं दे चलदे आया ऐ। अदालतै केन्द्र- सारे राज्यें ते केन्द्र शासित प्रदेशें गी 6 हफ्तें दे अंदर एसिड हमले दे पीड़ितें आस्तै लोड़चदी पुर्न बहाली ते उपाऽ तयार करने दे निर्देश दिते न। अदालतै केन्द्र सरकार ते राज्यें गी जरूरी सहायता प्रदान करने पर विचार करने लेई बी आखेआ- कन्नै गै अदालतै आखेआ ऐ जे पुर्नवास जत्तें च एसिड हमले दे पीड़ितें गी मुआवाज- चिकित्सा सहायता ते उच्च शिक्षा तगर पढाई शामिल होनी लोड़चदी।



Messi- Retired

मन्ने-परमन्ने दे फुटबॉल खडारी लियोनेल मेसी होरें अंतराष्ट्रीय फुटबॉल थमां सन्यास दी घोषणा करी दिती ऐ। एदे कन्नै गै अर्जेटीना आस्तै मैसी दे 20 बरे दे करियर दा अंत होई गेआ। इस दौरान उ'नें अर्जेटीना गी विश्व कप- 2 कोपा अमरीका खिताब जिताने च बड़ी भूमिका निभाई- मेसी होरें अर्जेटीना आस्तै रिकार्ड 207 मैच खेड्डे। मेसी होरें आखेआ जे स्पेन थमां विश्व कप फाइनल च थ्होई दी हार मगरा गै एह फैसला उन्दे मनै च हा। उ'नें आखेआ जे उन्दे पिता दा काल होई जाने मगरा उनें'गी लग्गा जे हुन फुटबाल थमां सन्यास लैने दा समां आई गेआ ऐ। 39 बरे दे मेसी नै अपने अधिकारिक इंस्टाग्राम एंकाउंट पर इक ब्यान जारी करिए इस फैसले दी जानकारी दिती ते तस्दीक कीती जे फुटबॉल इतिहास दे सब्बनें थमां गौरवशाली अंतराष्ट्रीय करियर मगरा हून ओह अर्जेटीना दी जर्सी च नजरी नेंई औडन।



IMD-Weather

मौसम विभाग नै अज्ज छत्तीसगढ़ च बड़ी मती भारी बरखा बरने दा रेड अलर्ट जारी कीता ऐ। हिमाचल प्रदेश- बिहार- पूर्वी मध्य प्रदेश- उत्तर प्रदेश- झारखंड- ओडिशा- उत्तराखंड ते पूर्वोत्तर भारत दे किश हिस्सें च बी भारी बरखा दी शेंका जताई गई ऐ। मौसम विभाग नै अज्ज जम्मू कश्मीर- हरियाणा- चंडीगढ़- पच्छिम बंगाल- कर्नाटक ते तेलंगाना च बी गरज-चमक कन्नै अंधी-झक्खड़ दी पेशनगोई कीती दी ऐ। एदे इलावा तमिलनाडू- पुद्दुचेरी- कराईकल ते अंडमान-निकोबार द्वीप समूह च बी इससै चाली दे हालात बने दे रौहने दी मेद ऐ। दिल्ली च मौसम विभाग नै अज्ज दपैहरी'लै अंधी-झक्खड़ ते गरज-चमक कन्नै हौली बरखा बरने दी पेशनगोई कीती ऐ।



UP –Firecracker Factory

उत्तर प्रदेश दे कौशम्बी च पटाखें दी इक फैक्टरी च होए दे इक बड्डे धमाके च 2 बच्चें सनें घट्टोघट्ट 11 जनें दी मौत होई गई ऐ ते 5 होर गंभीर तौरा पर जखमी होई गे न। खबरें मताबक पटाखें दी एह फैक्टरी खेती-बाड़ी आले खेतरें च स्थित इक मकान थमां चलाई जा'रदी ही। धमाके कन्नै नां छड़ा

फैक्टरी गी- सगुआं आले-दोआले दे घट्टो-घट्ट 5 घरें गी बी नुक्सान पुज्जा ऐ ते किश घरें दियें
खिड़कियें दे शीशें बी त्रुटी गे न। कौशाम्बी दे जिला मैजिस्ट्रेट अमित पाल होरें दस्सेआ जे एह
धमाका मनोरी पावर हाउस कश पिपरी पुलस स्टेशन इलाके च होआ ऐ। तुरत कारवाई करदे होई
पुलस दा अगग साहलने आला दस्ता ते वायु सेना दी टीमें सांझे तौरा पर बचाव अभियान शुरु करी
दिता।

